

四庫全書

史部

欽定四庫全書

史部

晉書卷一百二十八至
三十

詳校官庶吉士臣張溥

洗馬臣王坦修覆勘

覆校官中書臣馮培

校對官中書臣王鍾泰

校對官中書臣張塤

謄錄舉人臣張玫

謄錄監生臣史恒岱

欽定四庫全書

晉書卷一百二十八

唐太宗文皇帝御撰

載記第二十八

慕容超

慕容鍾

封字

慕容超字祖明德兄北海王納之子苻堅破鄴以納為
廣武太守數歲去官家于張掖德之南征留金刀而去
及垂起兵山東苻昌收納及德諸子皆誅之納母公孫

氏以耄獲免納妻段氏方娠未決囚之於郡獄獄掾呼延平德之故吏也嘗有死罪德免之至是將公孫及段氏逃于羌中而生超焉年十歲而公孫氏卒臨終授超以金刀曰若天下太平汝得東歸可以此刀還汝叔也平又將超母子奔于呂光及呂隆降于姚興超又隨涼州人徙于長安超母謂超曰吾母子全濟呼延氏之力平今雖死吾欲為汝納其女以答厚恩於是娶之超自以諸父在東恐為姚氏所錄乃陽狂行乞秦人賤之惟

姚紹見而異焉勸興拘以爵位召見與語超深自晦匿興大鄙之謂紹曰諺云妍皮不裹癡骨妄語耳由是得去來無禁德遣使迎之超不告母妻乃歸及至廣固呈以金刀具宣祖母臨終之言德撫之號慟超身長八尺胛帶九圍精彩秀發容止可觀德甚加禮遇始名之曰超封北海王拜侍中驃騎大將軍司隸校尉開府置佐吏德無子欲以超為嗣故為超起第於萬春門內朝夕觀之超亦深達德旨入則盡歡承奉出則傾身下士於

是內外稱美焉頃之立為太子及德死以義熙元年僭
嗣偽位大赦境內改元曰太上尊德妻段氏為皇太后
以慕容鍾都督中外諸軍錄尚書事慕容法為征南都
督徐兗揚南兗四州諸軍事慕容鎮加開府儀同三司
尚書令封孚為太尉麴仲為司空潘聰為左光祿大夫
封嵩為尚書左僕射自餘封拜各有差後又以鍾為青
州牧段宏為徐州刺史公孫五樓為武衛將軍領屯騎
校尉內叅政事封孚言於超曰臣聞五大不在邊五細

不在庭鍾國之宗臣社稷所賴宏外戚懿望親賢具瞻
正應叅翼百揆不宜遠鎮方外今鍾等出藩五樓內輔
臣竊未安超新即位害鍾等權逼以問五樓五樓欲專
斷朝政不欲鍾等在內屢有間言字說竟不行鍾宏俱
有不平之色相謂曰黃犬之皮恐當終補狐裘也五樓
聞之嫌隙漸構初超自長安行至梁父慕容法時為兗
州鎮南長史悅壽還謂法曰向見北海王子天資弘雅
神爽高邁始知天族多竒玉林皆寶法曰昔成方遂詐

稱衛太子人莫辯之此復天族乎超聞而恚恨形于言
色法亦怒處之外館由是結憾及德死法又不奔喪超
遣使讓焉法常懼禍至因此遂與慕容鍾段宏等謀反
超知而徵之鍾稱疾不赴於是收其黨侍中慕容統右
衛慕容根散騎常侍段封誅之車裂僕射封嵩於東門
之外西中郎將封融奔于魏超尋遣慕容鎮等攻青州
慕容昱等攻徐州慕容凝韓範攻梁父昱等攻莒城拔
之徐州刺史段宏奔于魏封融又集羣盜襲石塞城殺

鎮西大將軍餘鬱青土振恐人懷異議慕容凝謀殺韓
範將襲廣固範知而攻之凝奔梁父範并其衆攻梁父
尅之凝奔姚興慕容法出奔于魏慕容鎮尅青州鍾殺
其妻子為地道而出單馬奔姚興于時超不恤政事畋
游是好百姓苦之其僕射韓諱切諫不納超議復肉刑
九等之選乃下書於境內曰陽九數纏永康多難自北
都傾陷典章淪滅律令法憲靡有存者綱理天下此焉
為本既不能導之以德必湏齊之以刑且虞舜大聖猶

命咎繇作士刑之不可已已也如是先帝季興大業草
創兵革尚繁未遑脩制朕猥以不德嗣承大統撫御寡
方致蕭牆釁發遂戎馬生郊典儀寢廢今四境無虞所
宜脩定尚書可召集公卿至如不忠不孝若封嵩之輩
梟斬不足以痛之宜致烹轅之法亦可附之律條納以
大辟之科肉刑者乃先聖之經不刊之典漢文易之輕
重乖度今犯罪彌多死者稍衆肉刑之於化也濟育
既廣懲慝尤深光壽建興中二祖已議復之未及而晏

駕其令博士已上參考舊事依呂刑及漢魏晉律令消
息增損議成燕律五刑之屬三千而罪莫大於不孝孔
子曰非聖人者無法非孝者無親此大亂之道也輟裂
之刑烹煮之戮雖不在五品之例然亦行之自古渠彌
之輟著之春秋哀公之烹爰自中代世宗都齊亦愍刑
罰失中咨嗟寢食王者之有刑糾猶人之左右手焉故
孔子曰刑罰不中則人無所措手足是以蕭何定法令
而受封叔孫通以制儀為奉常立功立事古之所重其

明議損益以成一代準式周漢有貢士之條魏立九品
之選二者孰愈亦可詳聞羣下議多不同乃止超母妻
既先在長安為姚興所拘責超稱藩求太樂諸伎若不
可使送吳口千人超下書遣羣臣詳議左僕射段暉議
曰太上囚楚高祖不迴今陛下嗣守社稷不宜以私親
之故而降統天之尊又太樂諸伎皆是前世伶人不可
與彼使移風易俗宜掠吳口與之尚書張華曰若彼侵
掠吳邊必成鄰怨此既能往彼亦能來兵連禍結非國

之福也昔孫權重黎庶之命屈已以臣魏惠施惜愛子
之頭捨志以尊齊況陛下慈德在秦方寸崩亂宜暫降
大號以申至孝之情權變之道典謨所許韓範智能迴
物辯足傾人昔與姚興俱為秦太子中舍人可遣將命
降號脩和所謂屈於一人之下伸於萬人之上也超大
悅曰張尚書得吾心矣使範聘于興及至長安興謂範
曰封愷前來燕王與朕抗禮及卿至也歎然而附為依
春秋以小事大之義為當專以孝敬為母屈也範曰昔

周爵五等公侯異品小大之禮因而生焉今陛下命世
龍興光宅西秦本朝主上承祖宗遺烈定鼎東齊中分
天曜南面並帝通聘結好義尚謙冲使至於誕苟折行
人殊似吳晉爭盟滕薛競長恐傷大秦堂堂之盛有損
皇燕魏魏之美彼我俱失竊未安之興怒曰若如卿言
便是非為大小而來範曰雖由大小之義亦緣寡君純
孝過於重華願陛下體敬親之道霈然垂愍興曰吾久
不見賈生自謂過之今不及矣於是為範設舊交之禮

申叙平生謂範曰燕王在此朕亦見之風表乃可於機
辯未也範曰大辯若訥聖人美之况爾日龍潛鳳戢和
光同塵若使負日月而行則無繼天之業矣興笑曰可
謂使乎延譽者也範承間逞說姚興大悅賜範千金許
以超母妻還之慕容凝自梁父奔于姚興言於興曰燕
王稱藩本非推德權為母屈耳古之帝王尚興師徵質
豈可虛還其母乎母若一還必不復臣也宜先制其送
伎然後歸之興意乃變遣使聘於超超遣其僕射張華

給事中宗正元入長安送太樂伎一百二十人於姚興
興大悅延華入讌酒酣樂作興黃門侍郎尹雅謂華曰
昔殷之將亡樂師歸周今皇秦道盛燕樂來庭廢興之
兆見于此矣華曰自古帝王為道不同權譎之理會於
功成故老子曰將欲取之必先與之今總章西入必由
余東歸禍福之驗此其兆乎興怒曰昔齊楚競辯二國
連師鄉小國之臣何敢抗衡朝士華遜辭曰奉使之始
實願交歡上國上國既遺小國之臣辱及寡君社稷臣

亦何心而不仰酬興善之於是還超母妻義熙三年追尊其父為穆皇帝立其母段氏為皇太后妻呼延氏為皇后祀南郊將登壇有獸大如馬狀類鼠而色赤集於圜丘之側俄而不知所在頃與大風暴起天地晝昏其行宮羽儀皆振裂超懼密問其太史令成公綏對曰陛下信用姦臣誅戮賢良賦歛繁多事役殷苦所致也超懼而大赦譴責公孫五樓等俄而復之是歲廣固地震天齊水湧井水溢女水竭河濟凍合而澠水不冰超正

旦朝羣臣于東陽殿聞樂作歎音佾不備悔送伎於姚
興遂議入寇其領軍韓謨諫曰先帝以舊京傾沒戢翼
三齊苟時運未可上智輟謀今陛下嗣守成規宜閉關
養士以待賊釁不可結怨南鄰廣樹讎隙超曰我計已
定不與卿言於是遣其將斛穀提公孫歸等率騎寇宿
豫陷之執陽平太守劉千載濟陰太守徐阮大掠而去
簡男女二千五百付大樂教之時公孫五樓為侍中尚
書領左衛將軍專總朝政兄歸為冠軍常山公叔父頽

為武衛興樂公五樓宗親皆夾輔左右王公內外無不
憚之超論宿豫之功封斛穀提等並為郡縣公慕容鎮
諫曰臣聞懸賞待勲非功不侯今公孫歸結禍延兵殘
賊百姓陛下封之得無不可乎夫忠言逆耳非親不發
臣雖庸朽忝國戚藩輒盡愚欵惟陛下圖之超怒不答
自是百僚杜口莫敢開言尚書都令史王儼諂事五樓
遷尚書郎出為濟南太守入為尚書左丞時人為之語
曰欲得侯事五樓又遣公孫歸等率騎三千入寇濟南

執太守趙元略男女千餘人而去劉裕率師將討之超引見羣臣于東陽殿議距王師公孫五樓曰吳兵輕果所利在戰初鋒勇銳不可爭也宜據大岨使不得入曠日延時沮其銳氣可徐簡精騎二千循海而南絕其糧運別勅段暉率兗州之軍緣山東下腹背擊之上策也各命守宰依險自固校其資儲之外餘悉焚蕩芟除粟苗使敵無所資堅壁清野以待其釁中策也縱賊入岨出城逆戰下策也超曰京都殷盛戶口衆多非可一時

入守青苗布野非可卒芟設使芟苗守城以全性命朕
所不能今據五州之彊帶山河之固戰車萬乘鐵馬萬
羣縱令過峴至於平地徐以精騎踐之此成擒也賀賴
盧苦諫不從退謂五樓曰上不用吾計亡無日矣慕容
鎮曰若如聖旨必湏平原用馬為便宜出峴逆戰戰而
不勝猶可退守不宜縱敵入峴自貽窘逼昔成安君不
守井陘之關終屈於韓信諸葛瞻不據束馬之險卒擒
於鄧艾臣以為天時不如地利阻守大峴策之上也超

不從鎮出謂韓謨曰主上既不能芟苗守嶮又不肯徙人逃寇酷似劉璋矣今年國滅吾必死之卿等中華之士復為文身矣超聞而大怒收鎮下獄乃攝莒梁父二戍脩城隍簡士馬畜銳以待之其夏王師次東莞超遣其左軍段暉輔國賀賴廬等六將步騎五萬進據臨朐俄而王師度峴超懼率卒四萬就暉等于臨朐謂公孫五樓曰宜進據川源晉軍至而失水亦不能戰矣五樓馳騎據之劉裕前驅將軍孟龍符已至川源五樓戰敗

而返裕遣諮議叅軍檀韶率銳卒攻破臨朐超大懼單
騎奔段暉于城南暉衆又戰敗裕軍人斬暉超又奔還
廣固徙郭內人入保小城使其尚書郎張綱乞師于姚
興赦慕容鎮進錄尚書都督中外諸軍事引見羣臣謝
之曰朕嗣奉成業不能委賢任善而專固自由覆水不
收悔將何及智士逞謀必在事危忠臣立節亦在臨難
諸君其勉思六竒共濟艱運鎮進曰百姓之心係於一
人陛下既躬率六軍身先奔敗羣臣解心士庶喪氣內

外之情不可復恃如聞西秦自有內難恐不暇分兵救人正當更決一戰以爭天命今散卒還者猶有數萬可悉出金帛宮女餌令一戰天若相我足以破賊如其不濟死尚為美不可閉門坐受圍擊司徒慕容惠曰不然今晉軍乘勝有陵人之氣敗軍之將何以禦之秦雖與勃勃相持不足為患且二國連橫勢成唇齒今有寇難秦必救我但自古乞援不遣大臣則不致重兵是以趙隸三請楚師不出平原一使援至從成尚書令韓範德

望具瞻燕秦所重宜遣乞援以濟時艱於是遣範與王簿徃乞師于姚興未幾裕師圍城四面皆合人有竊告裕軍曰若得張綱為攻具者城乃可得耳是月綱自長安歸遂奔于裕裕令綱周城大呼曰勃勃大破秦軍無兵相救超怒伏弩射之乃退右僕射張華中丞封愷並為裕軍所獲裕令華愷與超書勸令早降超乃遺裕書請為藩臣以大峴為界并獻馬千匹以通和好裕弗許江南繼兵相尋而至尚書張俊自長安還又降于裕說

裕曰今燕人所以固守者外杖韓範冀得秦援範既時望又與姚興舊昵若勃勃敗後秦必救燕宜密信誘範啗以重利範來則燕人絕望自然降矣裕從之表範為散騎常侍遺範書以招之時姚興乃遣其將姚彊率步騎一萬隨範就其將姚紹于洛陽并兵來援會赫連勃勃大破秦軍興追彊還長安範歎曰天其滅燕乎會得裕書遂降於裕裕謂範曰卿欲立申包胥之功何以虛還也範曰自亡祖司空世荷燕寵故泣血秦庭冀匡禍

難屬西朝多故丹誠無效可謂天喪弊邑而贊明公智
者見機而作敢不至乎翌日裕將範循城由是人情離
駭無復固志裕謂範曰卿宜至城下告以禍福範曰雖
蒙殊寵猶未忍謀燕裕嘉而不彊左右勸超誅範家以
止後叛超知敗在旦夕又弟諲盡忠無二故不罪焉是
歲東萊雨血廣固城門鬼夜哭明年朔旦超登天門朝
羣臣于城上殺馬以饗將士文武皆有遷授超幸姬魏
夫人從超登城見王師之盛握超手而相對泣韓諲諫

曰陛下遭百六之會正是勉彊之秋而反對女子悲泣何其鄙也超拭目謝之其尚書令董銳勸超出降超大怒繫之於獄於是賀賴盧公孫五樓為地道出戰王師不利河間人玄文說裕曰昔趙攻曹疑望氣者以為澠水帶城非可攻拔若塞五龍口城必自陷石季龍從之而疑請降後慕容恪之圍段龕亦如之而龕降降後無幾又震開之今舊基猶在可塞之裕從其言至是城中男女患脚弱病者大半超輦而升城尚書悅壽言於超

曰天地不仁助寇為虐戰士疴病日就凋隕守困窮城
息望外援天時人事亦可知矣苟歷運有終堯舜降位
轉禍為福聖達以先宜追許鄭之蹤以存宗廟之重超
歎曰廢興命也吾寧奮劍決死不能銜壁求生於是張
網為裕造衝車覆以版屋蒙之以皮并設諸竒巧城上
火石弓矢無所施用又為飛樓懸梯木幔之屬遙臨城
上超大怒懸其母而支解之城出降者相繼裕四面
進攻殺傷甚眾悅壽遂開門以納王師超與左右數十

騎出亡為裕軍所執裕數之以不降之狀超神色自若
一無所言唯以母託劉敬宣而已送建康市斬之時年
二十六在位六年德以安帝隆安四年僭立至超二世
凡十一年以義熙六年滅

慕容鍾字道明德從弟也少有識量喜怒不形於色機
神秀發言論清辯至於臨難對敵知勇兼濟累進奇策
德用之頗中由是政無大小皆以委之遂為佐命元勳
後公孫五樓規挾威權慮鍾抑已因勸超誅之鍾遂謀

反事敗奔于姚興拜始平太守歸義侯

封字

封字字處道渤海蓆人也祖悛振威將軍父放慕容暉
之世吏部尚書字幼而聰敏和裕有士君子之稱寶僭
位累遷吏部尚書及蘭汗之篡南奔辟間渾渾表為渤
海太守德至莒城字出降德曰朕平青州不以為慶喜
於得卿也常外總機事內叅密謀雖位任崇重謙虛博
納甚有大臣之體及超嗣位政出權嬖多違舊章軌憲

日頽殘虐滋甚孚屢盡匡救超不能納也後臨軒謂孚曰朕於百王可方誰孚對曰桀紂之主超大慙怒孚徐步而出不為改容司空鞠仲失色謂孚曰與天子言何其亢厲宜應還謝孚曰行年七十墓木已拱惟求死所耳竟不謝以超三年死于家時年七十一文筆多傳于

世

史臣曰慕容德以季父之親居鄴中之重朝危未聞其節君存遽踐其位豈人理哉然稟倣儻之雄姿韞從橫

之遠略屬分崩之運成角逐之資跨有全齊竊弄神器
撫劍而爭衡秦魏練甲而志靜荆吳崇儒術以弘風延
謹言而勵已觀其為國有足稱焉超繼已成之基居霸
者之業政刑莫恤畋游是好杜忠良而讒佞進暗聽受
而勲戚離先緒俄頽家聲莫振陷宿豫而胎禍啓大岷
而延敵君臣就虜宗廟為墟迹其人謀非不幸也

贊曰德實姦雄轉敗為功奄有青土淫名域中超承偽
祚撓其國步廟失良籌庭悲霑露

晉書卷一百二十八

欽定四庫全書

晉書卷一百二十九

唐太宗文皇帝御撰

載記第二十九

沮渠蒙遜

沮渠蒙遜臨松盧水胡人也其先世為匈奴左沮渠遂以官為氏焉蒙遜博涉羣史頗曉天文雄傑有英略滑稽善權變梁熙呂光皆奇而憚之故常游飲自晦會伯

父羅仇麴粥從呂光征河南光前軍大敗麴粥言於兄
羅仇曰主上荒耄驕縱諸子朋黨相傾讒人側目今軍
敗將死正是智勇見猜之日可不懼乎吾兄弟素為所
憚與其經死溝瀆豈若勒衆向西平出荅藿奮臂大呼
涼州不足定也羅仇曰理如汝言但吾家累世忠孝為
一方所歸寧人負我無我負人俄而皆為光所殺宗姻
諸部會葬者萬餘人蒙遜哭謂衆曰昔漢祚中微吾之
乃祖翼獎寶融保寧河右呂王昏耄荒虐無道豈可不

上繼先祖安時之志使二父有恨黃泉衆咸稱萬歲遂
斬光中田護軍馬邃臨松令井祥以盟一旬之間衆至
萬餘屯據金山與從兄男成推光建康太守段業為使
持節大都督龍驤大將軍涼州牧建康公改呂光龍飛
二年為神璽元年業以蒙遜為張掖太守男成為輔國
將軍委以軍國之任業將使蒙遜攻西郡衆咸疑之蒙
遜曰此郡據嶺之要不可不取業曰卿言是也遂遣之
蒙遜引水灌城城潰執太守呂純以歸於是王德以晉

昌孟敏以敦煌降業業封蒙遜臨池侯呂弘去張掖將東走業議欲擊之蒙遜諫曰歸師勿遏窮寇弗追此兵家之戒也不如縱之以為後圖業曰一日縱敵悔將無及遂率衆追之為弘所敗業賴蒙遜而免歎曰孤不能用子房之言以至於此業築西安城以其將臧莫孩為太守蒙遜曰莫孩勇而無謀知進忘退所謂為之築冢非築城也業不從俄而為呂纂所敗蒙遜懼業不能容已每匿智以避之業僭稱涼王以蒙遜為尚書左丞梁

中庸為右丞呂光遣其二子紹纂伐業業請救於禿髮
烏孤烏孤遣其弟鹿孤及楊軌救業紹以業等軍盛欲
從三門關挾山而東纂曰挾山示弱取敗之道不如結
陣衝之彼必憚我而不戰也紹乃引軍而南業將擊之
蒙遜諫曰楊軌恃虜騎之強有窺覷之志紹纂兵在死
地必決戰求生不戰則有太山之安戰則有累卵之危
業曰卿言是也乃按兵不戰紹亦難之各引兵歸業憚
蒙遜雄武微欲遠之乃以蒙遜之從叔益生為酒泉太

守蒙遜為臨池太守業門下侍郎馬權雋爽有逸氣武
略過人業以權代蒙遜為張掖太守甚見親重每輕陵
蒙遜蒙遜亦憚而怨之乃譖之於業曰天下不足慮惟
當憂馬權耳業遂殺之蒙遜謂男成曰段業愚闇非濟
亂之才信讒愛佞無鑒斷之明所憚惟索嗣馬權今皆
死矣蒙遜欲除業以奉兄何如男成曰業羈旅孤飄我
所建立有吾兄弟猶魚之有水人既親我背之不祥乃
止蒙遜既為業所憚內不自安請為西安太守業亦以

蒙遜有大志懼為朝夕之變乃許焉蒙遜期與男成同祭蘭門山密遣司馬許咸告業曰男成欲謀叛許以取假日作逆若求祭蘭門山臣言驗矣至期日果然業收男成令自殺男成曰蒙遜欲謀叛先以告臣臣以兄弟之故隱忍不言以臣今在恐部人不從與臣剋期祭山返相告誣臣若朝死蒙遜必夕發乞詐言臣死說臣罪惡蒙遜必作逆臣投袂討之事無不捷業不從蒙遜聞男成死泣告衆曰男成忠於段公枉見屠害諸君能為

報仇乎且州土兵亂似非業所能濟吾所以初奉之者以之為陳吳耳而信讒多忌枉害忠良豈可安枕臥觀使百姓懼於塗炭男成素有恩信眾皆憤泣而從之比至氏池眾逾一萬鎮軍臧莫孩率部眾附之羌胡多起兵響應蒙遜壁于侯塢業先疑其右將軍田昂幽之于內至是謝而赦之使與武衛梁中庸等攻蒙遜業將王豐孫言於業曰西平諸田世有反者昂貌恭而心很志大而情險不可信也業曰吾疑之久矣但非昂無可以

討蒙遜豐孫言既不從昂至侯塢率騎五百歸于蒙遜
蒙遜至張掖昂兄弟承愛斬關內之業左右皆散蒙遜
大呼曰鎮西何在軍人曰在此業曰孤單飄一已為貴
門所推可見旬餘命投身嶺南庶得東還與妻子相見
蒙遜遂斬之業京兆人也博涉史傳有尺牘之才為杜
進記室從征塞表儒素長者無他權略威禁不行羣下
擅命尤信卜筮讖記巫覡徵祥故為姦佞所誤隆安五
年梁中庸房晷田昂等推蒙遜為使持節大都督大將

軍涼州牧張掖公赦其境內改元永安署從兄伏奴為鎮軍將軍張掖太守和平侯弟挈為建忠將軍都谷侯田昂為鎮南將軍西郡太守臧莫孩為輔國將軍房晷梁中庸為左右長史張隲謝正禮為左右司馬擢任賢才文武咸悅時姚興遣將姚碩德攻呂隆于姑臧蒙遜遣從事中郎李典聘于興以通和好蒙遜以呂隆既降于興酒泉涼寧二郡叛降李玄盛乃遣建忠挈牧府長史張潛見碩德于姑臧請軍迎接率郡人東遷碩德大

悅拜潛張掖太守掎建康太守潛勸蒙遜東遷掎私於
蒙遜曰呂氏猶存姑臧未拔碩德糧竭將還不能久也
何故違離桑梓受制於人輔國莫孩曰建忠之言是也
蒙遜乃斬張潛因下書曰孤以虛薄猥忝時運未能弘
闡大猷戡蕩羣孽使桃蟲鼓翼東京封豕烝涉西裔戎
車屢動干戈未戢農失三時之業百姓戶不粒食可蠲
省百徭專功南畝明設科條務盡地利時梁中庸為西
郡太守西奔李玄盛蒙遜聞之笑曰吾與中庸義深一

體而不信我但自負耳孤豈尤之乃盡歸其妻孥蒙遜
下令曰養老乞言晉文納輿人之誦所以能招禮英奇
致時邕之美况孤寡德智不經遠而可不思聞讜言以
自鏡哉內外羣僚其各搜揚賢儁廣進芻蕘以匡孤不
逮遣輔國臧莫孩襲山北虜大破之姚興遣將齊難率
衆四萬迎呂隆隆勸難伐蒙遜難從之莫孩敗其前軍
難乃結盟而還蒙遜伯父中田護軍親信臨松太守孔
篤並驕奢侵害百姓苦之蒙遜曰亂吾國者二伯父也

何以紀綱百姓乎皆令自殺蒙遜襲狄洛磐于番禾不
剋遷其五百餘戶而還姚興遣使人梁斐張構等拜蒙
遜鎮西大將軍沙州刺史西海侯時興亦拜禿髮儁檀
為車騎將軍封廣武公蒙遜聞之不悅謂斐等曰儁檀
上公之位而身為侯者何也構對曰儁檀輕狡不仁欸
誠未著聖朝所以加其重爵者褒其歸善即叙之義耳
將軍忠貫白日勲高一時當入諧鼎味匡贊帝室安可
以不信待也聖朝爵必稱功官不越德如尹緯姚晃佐

命初基齊難徐洛元勳驍將並位纔二品爵止侯伯將軍何以先之乎竇融殷勤固讓不欲居舊臣之右未解將軍忽有此問蒙遜曰朝廷何不即以張掖見封乃更遠封西海邪構曰張掖規畫之內將軍已自有之所以遠授西海者蓋欲廣大將軍之國耳蒙遜大悅乃受拜時地震山崩折木太史令劉梁言於蒙遜曰辛酉金地震於金金動刻木大軍東行無前之徵時張掖城每有光色蒙遜曰王氣將成百戰百勝之象也遂攻禿髮

西郡太守楊統於日勒統降拜為右長史寵踰功舊張掖太守向呼勒出奔西涼以從弟成都為金山太守羅仇子也鄯為西郡太守麴粥子也向呼勒自西涼奔還待之如初蒙遜率騎二萬東征次于丹嶺北虜大人思盤率部落三千降之時木連理生于永安永安令張披上書曰異枝同幹遐方有齊化之應殊本共心上下有莫二之固蓋至道之嘉祥大同之美徵蒙遜曰此皆二千石令長匪躬濟時所致豈吾薄德之所能感也蒙遜

率步騎二萬伐禿髮儁檀次于西郡大風從西北來氣
有五色俄而晝昏至顯美徙數千戶而還儁檀追及蒙
遜于窮泉蒙遜將擊之諸將皆曰賊已安營弗可犯也
蒙遜曰儁檀謂吾遠來疲弊必輕而無備及其壘壁未
成可以一鼓而滅進擊敗之乘勝至于姑臧夷夏降者
萬數千戶儁檀懼請和許之而歸及儁檀南奔樂都魏
安人焦朗據姑臧自立蒙遜率步騎三萬攻朗剋而宥
之饗文武將士于謙光殿班賜金馬有差以敦煌張穆

博通經史才藻清贍擢拜中書侍郎委以機密之任以
其弟孚為護羌校尉秦州刺史封安平侯鎮姑臧旬餘
而孚死又以從祖益子為鎮京將軍護羌校尉秦州刺
史鎮姑臧俄而蒙遜遷于姑臧以義熙八年僭即河西
王位大赦境內改元立始置官僚如呂光為三河王故
事繕宮殿起城門諸觀立其子政德為世子加鎮衛大
將軍錄尚書事僭檀來伐蒙遜敗之於若厚塢僭檀湟
河太守文支據湟川護軍成宜侯率衆降之署文支鎮

東大將軍廣武太守振武侯成宜侯為振威將軍湟川
太守以殿中將軍王建為湟河太守蒙遜下書曰古先
哲王應期撥亂者莫不經略八表然後光闡純風孤雖
智非靖難職在濟時而狡虜僞檀鴟峙舊京毒加夷夏
東苑之戮酷甚長平邊城之禍害深獫狁每念蒼生之
無辜是以不遑啓處身疲甲冑體倦風塵雖傾其巢穴
僞檀猶未授首僞檀弟文支追項伯歸漢之義據彼重
藩請為臣妾自西平已南連城繼順惟僞檀窮獸守死

樂都四支既落命豈久全五緯之會已應清一之期無
賒方散馬金山黎元永逸可露布遠近咸使聞知蒙遜
西如茗藿遣冠軍伏恩率騎三萬襲卑和烏啼二虜大
破之俘二千餘落而還蒙遜寢於新臺閣人王懷祖擊
蒙遜傷足其妻孟氏擒斬之夷其三族蒙遜母車氏疾
篤蒙遜升南景門散錢以賜百姓下書曰孤庶憑宗廟
之靈乾坤之祐濟否剝之運會拯遺黎之荼蓼上望掃
清氛穢下冀保寧家福而太后不豫涉歲彌增將刑獄

枉濫衆有怨乎賦役繁重時不堪乎羣望不絜神所譴
乎內省諸身未知罪之攸在可大赦殊死已下俄而車
氏死蒙遜遣其將運糧于涅河自率衆攻剋乞伏熾磐
廣武郡以運糧不繼自廣武如涅河度浩疊熾磐遣將
乞伏暉尼寅距蒙遜蒙遜擊斬之熾磐又遣將王衡折
斐麴景等率騎一萬據勒姐嶺蒙遜且戰且前大破之
擒折斐等七百餘人麴景奔還蒙遜以弟漢平為折衝
將軍涅河太守乃引還晉益州刺史朱齡石遣使來聘

蒙遜遣舍人黃迅報聘益州因表曰上天降禍四海分
崩靈耀擁于南裔蒼生沒于醜虜陛下累聖重光道邁
周漢純風所被八表宅心臣雖被髮邊徼才非時儁謬
為河右遺黎推為盟主臣之先人世荷恩寵雖歷夷嶮
執義不回傾首朝陽乃心王室去冬益州刺史朱齡石
遣使詣臣始具朝廷休問承車騎將軍劉裕秣馬揮戈
以中原為事可謂天贊大晉篤生英輔臣聞少康之興
大夏光武之復漢業皆奮劔而起衆無一旅猶能成配

天之功著車攻之詠陛下據全楚之地擁荆揚之銳而可垂拱晏然棄二京以資戎虜若六軍北軫剋復有期臣請率河西戎為晉右翼前驅熾磐率眾三萬襲湟河漢平力戰固守遣司馬隗仁夜出擊熾磐斬級數百熾磐將引退先遣老弱漢平長史焦昶將軍段景密信招熾磐熾磐復進攻漢平漢平納昶景之說面縛出降仁勒壯士百餘據南門樓上三日不下眾寡不敵為熾磐所擒熾磐怒命斬之段暉諫曰仁臨難履危奮不顧命

忠也宜宥之以厲事君熾磐乃執之而歸在熾磐所五年暉又為之固請乃得還姑臧及至蒙遜執其手曰卿孤之蘇武也以為高昌太守為政有威惠之稱然頗以愛財為失蒙遜西祀金山遣沮渠廣宗率騎一萬襲烏啼虜大捷而還蒙遜西至若薈遣前將軍沮渠成都將騎五千襲卑和虜蒙遜率中軍三萬繼之卑和虜率眾迎降遂循海而西至鹽池祀西王母寺寺中有玄石神圖命其中書侍郎張穆賦焉銘之于寺前遂如金山而

歸蒙遜下書曰頃自春炎旱害及時苗碧原青野倏為
枯壤將刑政失中下有冤獄乎役繁賦重上天所譴乎
內省多缺孤之罪也書不云乎百姓有過罪予一人可
大赦殊死已下翼日而澍雨大降蒙遜聞劉裕滅姚泓
怒甚門下校郎劉祥言事於蒙遜蒙遜曰汝聞劉裕入
關敢研研然也遂殺之其峻暴如此顧謂左右曰古之
行師不犯歲鎮所在姚氏舜後軒轅之苗裔也今鎮星
在軒轅而裕滅之亦不能久守關中蒙遜為李士業敗

於解支澗復收散卒欲戰前將軍成都諫曰臣聞高祖
有彭城之敗終成大漢宜旋師以為後圖蒙遜從之城
建康而歸其羣下上書曰設官分職所以經國濟時恪
勤官次所以緝熙庶政當官者以匪躬為務受任者以
忘身為效自皇綱初震戎馬生郊公私草創未遑舊式
而朝士多違憲制不遵典章或公文御按在家卧署或
事無可否望空而過至今黜陟絕於皇朝駁議寢於聖
世清濁共流能否相雜人無勸競之心苟為度日之事

豈憂公忘私奉上之道也今皇化日隆遐邇寧泰宜肅振綱維申修舊則蒙遜納之命征南姚艾尚書左丞房畧撰朝堂制行之旬日百僚振肅太史令張衍言於蒙遜曰今歲臨澤城西當有破兵蒙遜乃遣其世子政德屯兵若厚塢蒙遜西至白岸謂張衍曰吾今年當有所定但太歲在申月又建申未可西行且當南巡要其歸會主而勿客以順天心計在臨機慎勿露也遂攻浩亶而蛇盤於帳前蒙遜笑曰前一為騰蛇今盤在吾帳

天意欲吾迴師先定酒泉燒攻具而還次于川巖聞李士業徵兵欲攻張掖蒙遜曰入吾計矣但恐聞吾迴軍不敢前也兵事尚權乃露布西境稱得浩疊將進軍黃谷士業聞而大悅進入都瀆澗蒙遜潛軍逆之敗士業於壞城遂進剋酒泉百姓安堵如故軍無私焉以子茂虔為酒泉太守士業舊臣皆隨才擢叙蒙遜以安帝隆安元年自稱州牧義熙八年僭立後八年而宋氏受禪以元嘉十年死時年六十六在偽位三十三年子茂虔

立六年為魏所擒合三十九載而滅

史臣曰蒙遜出自夷貊擅雄邊塞屬呂光之悖德深懷
仇弔之冤推段業以濟時假以陳吳之事稱兵白澗南
涼請和出師丹嶺北寇賓服然而見利忘義苞禍滅親
雖能制命一隅抑亦備諸凶德者矣

贊曰光猜人傑業忌時賢游飲自晦匿智圖全兇心既
逞偽績攸宣挺茲姦數馳競當年

晉書卷一百二十九

晉書卷一百二十九考證

沮渠蒙遜載記乃以蒙遜之從叔益生為酒泉太守○
監本遜字下脫之字叔字下行下字今從宋本增刪
蒙遜曰汝聞劉裕入關敢研研然也○史炤曰研研五
見反正誤謂以文義及音義推之與斷斷相類忿爭
強辨之意只如字讀

晉書卷一百二十九考證

欽定四庫全書

晉書卷一百三十

唐太宗文皇帝御撰

載記第三十

赫連勃勃

赫連勃勃字屈子匈奴右賢王去卑之後劉元海之族也
曾祖武劉聰世以宗室封樓煩公拜安北將軍監鮮卑
諸軍事丁零中郎將雄據肆盧川為代王猗盧所敗

遂出塞表祖豹子招集部落復為諸部之雄石季龍遣使就拜平北將軍左賢王丁零單于父衛辰入居塞內苻堅以為西單于督攝河西諸虜屯于代來城及堅國亂遂有朔方之地控弦之士三萬八千後魏師伐之辰令其子力侯提距戰為魏所敗魏人乘勝濟河剋代來執辰殺之勃勃乃奔于叱干部叱干佗斗伏送勃勃於魏佗斗伏兄子阿利先成大洛川間將送勃勃馳諫曰烏雀投人尚宜濟免况勃勃國破家亡歸命於我縱不

能容猶宜任其所奔今執而送之深非仁者之舉佗斗
伏懼為魏所責弗從阿利潛遣勁勇篡勃勃於路送於
姚興高平公沒弁于弁于以女妻之勃勃身長八尺五
寸腰帶十圍性辯慧美風儀興見而竒之深加禮敬拜
驍騎將軍加奉車都尉常叅軍國大議寵遇踰於勲舊
興弟邕言於興曰勃勃天性不仁難以親近陛下寵遇
太甚臣竊惑之興曰勃勃有濟世之才吾方收其藝用
與之共平天下有何不可乃以勃勃為安遠將軍封陽

川侯使助沒弈于鎮高平以三城朔方雜夷及衛辰部
衆三萬配之使為伐魏偵候姚邕固諫以為不可興曰
卿何以知其性氣邕曰勃勃奉上慢御衆殘貪暴無親
輕為去就寵之踰分終為邊害興乃止頃之以勃勃為
持節安北將軍五原公配以三交五部鮮卑及雜虜二
萬餘落鎮朔方時河西鮮卑杜淪獻馬八千匹于姚興
濟河至大城勃勃留之召其衆三萬餘人偽獵高平川
襲殺沒弈于而并其衆衆至數萬義熙二年僭稱天王

大單于赦其境內建元曰龍昇署置百官自以匈奴夏
后氏之苗裔也國稱大夏以其長兄右地代為丞相代
公次兄力侯提為大將軍魏公叱干阿利為御史大夫
梁公弟阿利羅引為征南將軍司隸校尉若門為尚書
令叱以鞬為征西將軍尚書左僕射乙斗為征北將軍
尚書右僕射自餘以次授任其年討鮮卑薛于等三部
破之降衆萬數千進討姚興三城已北諸戍斬其將楊
丕姚石生等諸將諫固險不從又復言於勃勃曰陛下

將欲經營宇內南取長安宜先固根本使人心有所憑
繫然後大業可成高平險固山川沃饒可以都也勃勃
曰卿徒知其一未知其二吾大業草創衆旅未多姚興
亦一時之雄關中未可圖也且其諸鎮用命我若專固
一城彼必并力於我衆非其敵亡可立待吾以雲騎風
馳出其不意救前則擊其後救後則擊其前使彼疲於
奔命我則游食自若不及十年嶺北河東盡我有也待
姚興死後徐取長安姚泓凡弱小兒擒之方略已在吾

計中矣昔軒轅氏亦遷居無常二十餘年豈獨我乎於是侵掠嶺北嶺北諸城門不晝啓興歎曰吾不用黃兒之言以至於此黃兒姚邕小字也勃勃初僭號求婚於秃髮儁檀儁檀弗許勃勃怒率騎二萬伐之自楊非至於支陽三百餘里殺傷萬餘人驅掠二萬七千口牛馬羊數十萬而還儁檀率衆追之其將焦朗謂儁檀曰勃勃天姿雄鷲御軍齊肅未可輕也今因抄掠之資率思歸之士人自為戰難與爭鋒不如從温圍北渡趣萬斛

堆阻水結營制其咽喉百戰百勝之術也儻將賀連
怒曰勃勃以死亡之餘率烏合之衆犯順結禍幸有大
功今牛羊塞路財寶若山窘弊之餘人懷貪競不能督
厲士衆以抗我也我以大軍臨之必土崩魚潰今引軍
避之示敵以弱我衆氣銳宜在速追儻曰吾追計決
矣敢諫者斬勃勃聞而大喜乃於陽武下陝鑿陵埋車
以塞路儻遣善射者射之中勃勃左臂勃勃乃勒衆
逆擊大敗之追奔八十餘里殺傷萬計斬其大將十餘

人以為京觀號髑髏臺還于嶺北勃勃與姚興將張佛
生戰于青石原又敗之俘斬五千七百人興遣將齊難
率衆二萬來伐勃勃退如河曲難以去勃勃既遠縱兵
掠野勃勃潛軍覆之俘獲七千餘人收其戎馬兵仗難
引軍而退勃勃復追擊于木城拔之擒難俘其將士萬
有三千戎馬萬匹嶺北夷夏降附者數萬計勃勃於是
拜置守宰以撫之勃勃乃率騎二萬入高岡及于五井
掠平涼雜胡七千餘戶以配後軍進屯依力川姚興來

伐至三城勃勃候興諸軍未集率騎擊之興大懼遣其將姚文宗距戰勃勃偽退設伏以待之興遣其將姚榆生等追之伏兵夾擊皆擒之興將王奚聚羗胡三千餘戶于勃竒堡勃勃進攻之奚驍悍有膂力短兵接戰勃勃之衆多為所傷於是堰斷其水堡人窘迫執奚出降勃勃謂奚曰卿忠臣也朕方與卿共平天下奚曰若蒙大恩速死為惠乃與所親數十人自刎而死勃勃又攻興將金洛生于黃石固彌姐豪地于我羅城皆拔之徙

七千餘家于大城以其丞相右地代領幽州牧以鎮之
遣其尚書金纂率騎二萬攻平涼姚興來救纂為興所
敗死之勃勃兄子左將軍羅提率步騎一萬攻興將姚
廣都于定陽剋之坑將士四千餘人以女弱為軍賞拜
廣都為太常勃勃又攻興將姚壽都于清水城壽都奔
上邽徙其人萬六千家于大城是歲齊難姚廣都謀叛
皆誅之姚興將姚詳棄三城南奔大蘇勃勃遣其將平
東鹿奔于要擊之執詳盡俘其衆詳至勃勃數而斬之

其年勃勃率騎三萬攻安定與姚興將楊佛嵩戰于青石北原敗之降其衆三萬五千獲戎馬二萬匹進攻姚興將党智隆于東鄉降之署智隆光祿勳徙其三千餘戶于貳城姚興鎮北叅軍王買德來奔勃勃謂買德曰朕大禹之後世居幽朔祖宗重輝常與漢魏為敵國中世不競受制於人逮朕不肖不能紹隆先構國破家亡流離漂虜今將應運而興復大禹之業卿以為何如買德曰自皇晉失統神器南移羣雄嶽峙人懷問鼎况陞

下卉葉載德重光朔野神武超於漢王聖略邁於魏祖
而不於天啓之機建成大業乎今秦政雖衰藩鎮猶固
深願蓄力待時詳而後舉勃勃善之拜軍師中郎將乃
赦其境內改元為鳳翔以叱干阿利領將作大匠發嶺
北夷夏十萬人於朔方水北黑水之南營起都城勃勃
自言朕方統一天下君臨萬邦可以統萬為名阿利性
尤工巧然殘忍刻薄乃蒸土築城雖入一寸即殺作者
而并築之勃勃以為忠故委以營繕之任又造五兵之

器精銳尤甚既成呈之工匠必有死者射甲不入即斬
弓人如其入也便斬鎧匠又造百鍊剛刀為龍雀大環
號曰大夏龍雀銘其背曰古之利器吳楚湛盧大夏龍
雀名冠神都可以懷遠可以柔邇如風靡草威服九區
世甚珍之復鑄銅為大鼓飛廉翁仲銅駝龍獸之屬皆
以黃金飾之列於宮殿之前凡殺工匠數千以是器物
莫不精麗於是議討乞伏熾磐王買德諫曰明王之行
師也軌物以德不以暴且熾磐我之與國新遭大喪今

若伐之豈所謂乘理而動上感靈和之義乎苟恃衆力
因人喪難匹夫猶耻為之而况萬乘哉勃勃曰甚善微
卿朕安聞此言其年下書曰朕之皇祖自北遷幽朔姓
改妣氏音殊中國故從母氏為劉子而從母之姓非禮
也古人氏族無常或以因生為氏或以王父之名朕將
以義易之帝王者繫天為子是為徽赫實與天連今改
姓曰赫連氏庶協皇天之意永享無疆大慶係天之尊
不可令支庶同之其非正統皆以鐵伐為氏庶朕宗族

子孫剛銳如鐵皆堪伐人立其妻梁氏為王后子瓚為太子封子延陽平公昌太原公倫酒泉公定平原公滿河南公安中山公又攻姚興將姚逵于杏城二旬剋之執逵及其將姚大用姚安和姚利僕尹敵等坑戰士二萬人遣其御史中丞烏洛孤盟於沮渠蒙遜曰自金晉數終禍纏九服趙魏為長蛇之墟秦隴為豺狼之穴二都神京鞠為茂草蠢爾羣生罔知憑賴上天悔禍運屬二家封疆密邇道會義親宜敦和好弘康世難爰自終

古有國有家非盟誓無以昭神祇之心非斷金無以定
終始之好然晉楚之成吳蜀之約咸口血未乾而尋背
之今我二家契殊曩日言未發而有篤愛之心音一交
而懷傾蓋之顧息風塵之警同克濟之誠戮力天心共
濟六合若天下有事則雙振義旗區域既清則並敦魯
衛夷險相赴交易有無爰及子孫永崇斯好蒙遜遣其
將沮渠漢平來盟勃勃聞姚泓將姚嵩與氐王楊盛相
持率騎四萬襲上邽未至而嵩為盛所殺勃勃攻上邽

二旬剋之殺泓秦州刺史姚平都及將士五千人毀城而去進攻陰密又殺興將姚良子及將士萬餘人以其子昌為使持節前將軍雍州刺史鎮陰密泓將姚恢棄安定奔于長安安定人胡儼華韜率戶五萬據安定降于勃勃以儼為侍中韜為尚書留鎮東羊苟兒鎮之配以鮮卑五千進攻泓將姚謔于雍城謔奔長安勃勃進師次郿城泓遣其將姚紹來距勃勃退如安定胡儼等襲殺苟兒以城降泓勃勃引歸杏城笑謂羣臣曰劉裕

伐秦水陸兼進且裕有高世之略姚泓豈能自固吾驗
以天時人事必當剋之又其兄弟內叛安可以距人裕
既剋長安利在速返正可留子弟及諸將守關中待裕
發軫吾取之若拾芥耳不足復勞吾士馬於是秣馬厲
兵休養士卒尋進據安定姚泓嶺北鎮戍郡縣悉降勃
勃於是盡有嶺北之地俄而劉裕滅泓入于長安遣使
遺勃勃書請通和好約為兄弟勃勃命其中書侍郎皇
甫徽為文而陰誦之召裕使前口授舍人為書封以答

裕裕覽其文而竒之使者又言勃勃容儀瓌偉英武絕人裕歎曰吾所不如也既而勃勃還統萬裕留子義真鎮長安而還勃勃聞之大悅謂王買德曰朕將進圖長安卿試言取之方略買德曰劉裕滅秦所謂以亂平亂未有德政以濟蒼生關中形勝之地而以弱才小兒守之非經遠之規也狼狽而返者欲速成篡事耳無暇有意於中原陛下以順伐逆義貫幽顯百姓以君命望陛下義旗之至以日為歲矣青泥上洛南師之衝要宜置

游兵斷其去來之路然後杜潼關塞峭陝絕其水陸之道陛下聲檄長安申布恩澤三輔父老皆壺漿以迎王師矣義真獨坐空城逃竄無所一旬之間必面縛麾下所謂兵不血刃不戰而自定也勃勃善之以子璜都督前鋒諸軍事領撫軍大將軍率騎二萬南伐長安前將軍赫連昌屯兵潼關以買德為撫軍右長史南斷青泥勃勃率大軍繼發璜至渭陽降者屬路義真遣龍驤將軍沈田子率衆逆戰不利而退屯劉迴堡田子與義真

司馬王鎮惡不平因鎮惡出城遂殺之義真又殺田子於是悉召外軍入于城中閉門距守關中郡縣悉降璜夜襲長安不剋勃勃進據咸陽長安樵採路絕劉裕聞之大懼乃召義真東鎮洛陽以朱齡石為雍州刺史守長安義真大掠而東至於灞上百姓遂逐齡石而迎勃勃入于長安璜率衆三萬追擊義真王師敗績義真單馬而遁買德獲晉寧朔將軍傅弘之輔國將軍蒯恩義真司馬毛脩之於青泥積人頭以為京觀於是勃勃大

饗將士于長安舉觴謂王買德曰卿往日之言一周而
果效可謂筭無遺策矣雖宗廟社稷之靈亦卿謀猷之
力也此觴所集非卿而誰於是拜買德都官尚書加冠
軍將軍封河陽侯赫連昌攻齡石及龍驤將軍王敬於
潼關之曹公故壘剋之執齡石及敬送於長安羣臣乃
勸進勃勃曰朕無撥亂之才不能弘濟兆庶自枕戈寢
甲十有二年而四海未同遺寇尚熾不知何以謝責當
年垂之來葉將明揚仄陋以王位讓之然後歸老朔方

琴書卒歲皇帝之號豈薄德所膺羣臣固請乃許之於是為壇于灞上僭即皇帝位赦其境內改元為昌武遣其將叱奴侯提率步騎二萬攻晉并州刺史毛德祖于蒲坂德祖奔于洛陽以侯提為并州刺史鎮蒲坂勃勃歸于長安徵隱士京兆韋祖思既至而恭懼過禮勃勃怒曰吾以國士徵汝奈何以非類處吾汝昔不拜姚興何獨拜我今未死汝猶不以為帝王吾死之後汝輩弄筆當置吾何地遂殺之羣臣勸都長安勃勃曰朕

豈不知長安累帝舊都有山河四塞之固但荆吳僻遠
勢不能為人之患東魏與我同壤境去北京裁數百餘
里若都長安北京恐有不守之憂朕在統萬彼終不敢
濟河諸卿適未見此耳其下咸曰非所及也乃於長安
置南臺以壻領大將軍雍州牧錄南臺尚書事勃勃還
統萬以宮殿大成於是赦其境內又改元曰真興刻石
都南頌其功德曰夫庸大德盛者必建不刊之業道積
慶隆者必享無窮之祚昔在陶唐數終厄運我皇祖大

禹以至聖之姿當經綸之會鑿龍門而闢伊闕疏三江而決九河夷一元之窮災拯六合之沉溺鴻績侔於天地神功邁於造化故二儀降祉三靈叶贊揖讓受終光啓有夏傳世二十歷載四百賢辟相承哲王繼軌徽猷冠於玄古高範煥乎疇昔而道無常夷數或屯險王桀不綱網漏殷氏用使金暉絕于中天神轡輟于促路然純曜未渝慶繇萬祀龍飛漠南鳳峙朔北長轡遠馭則西罩崑山之外密網遐張則東絙滄海之表爰始逮今

二千餘載雖三統迭制於喟函五德革運於伊洛秦雍
成篡弑之墟周豫為爭奪之藪而幽朔謚爾主有常尊
於上海代晏然物無異望於下故能控弦之衆百有餘
萬躍馬長驅鼓行秦趙使中原疲於奔命諸夏不得高
枕為日久矣是以偏師暫擬涇陽推隆周之鋒赫斯一
奮平陽挫漢祖之銳雖霸王繼蹤猶朝日之升扶桑英
豪接踵若夕月之登濛汜自開闢已來未始聞也非夫
卜世與乾坤比長鴻基與山嶽齊固孰能本支於千葉

重光於萬祀履寒霜而踰滎蒙重氛而彌耀者哉於是
玄符告徵大猷有會我皇誕命世之期應天縱之運仰
協時休俯順時望龍升北京則義風蓋於九區鳳翔天
域則威聲格於八表屬姦雄鼎峙之秋羣凶嶽立之際
昧旦臨朝日旰忘膳運籌命將舉無遺策親御六戎則
有征無戰故偽秦以三世之資喪魂於闕隴河源望旗
而委質北虜欽風而納款德音著于柔服威刑彰于伐
叛文教與武功並宣俎豆與干戈俱運五稔之間道風

弘著暨乎七載而王猷允洽乃遠惟周文啓經始之基
近詳山川究形勝之地遂營起都城開建京邑背名山
而面洪流左河津而右重塞高隅隱日崇墉際雲石郭
天池周繇千里其為獨守之形險絕之狀固以遠邁於
咸陽超美於周洛若乃廣五郊之義尊七廟之制崇左
社之規建右稷之禮御太一以繕明堂模帝坐而營露
寢闔闔披霄而山亭象魏排虛而嶽峙華林靈沼崇臺
祕室通房連閣馳道苑園可以蔭映萬邦光覆四海莫

不鬱然並建森然畢備若紫微之帶皇穹閭風之跨后
土然宰司鼎臣羣黎士庶僉以為重威之式有闕前王
於是延王爾之奇工命班輸之妙匠搜文梓於鄧林採
繡石於恒嶽九域貢以金銀八方獻其瓌寶親運神奇
叅制規矩營離宮於露寢之南起別殿於永安之北高
構千尋崇基萬仞玄棟鏤梲若騰虹之揚眉飛簷舒罽
似翔鵬之矯翼二序啓矣而五時之坐開四隅陳設而
一御之位建溫宮膠葛涼殿崢嶸絡以隋珠粹以金鏡

雖曦望互升於表而中無晝夜之殊陰陽迭更於外而
內無寒暑之別故善目者不能為其名博辯者不能究
其稱斯蓋神明之所規模非人工之所經制若乃尋名
以求類跡狀以效真據質以究名形疑妙出雖如來須
彌之寶塔帝釋忉利之神宮尚未足以喻其麗方其飾
矣昔周宣考室而詠於詩人闕宮有仞而頌聲是作况
乃太微肇制清都啓建軌一文昌舊章唯始咸秩百神
賓享萬國羣生開其耳目天下詠其來蘇亦何得不播


之管絃刊之金石哉乃樹銘都邑敷讚碩美俾皇風振
於來葉聖庸垂乎不朽其辭曰於赫靈祚配乾比隆魏
巍大禹堂堂聖功仁被蒼生德格玄穹帝錫玄珪揖讓
受終哲王繼軌光闡徽風道無常夷數或不競金精南
邁天輝北映靈祉踰昌世業彌盛惟祖惟父克廣休命
如彼日月連光接鏡玄符瑞德乾運有歸誕鍾我后應
圖龍飛落落神武恢恢聖姿名教內敷羣妖外夷化光
四表威截九圍封畿之制王者常經乃延翰爾肇建帝

京土苞上壤地跨勝形庶人子來不日而成崇臺霄峙
秀闕雲亭千榭連隅萬閣接屏晃若晨曦昭若列星離
宮既作別宇云施爰構崇明仰準乾儀懸甍風閱飛軒
雲垂溫室嵯峨層城參差楹雕虬獸節鏤龍螭瑩以寶
璞飾以珍竒稱因褒著名由實揚偉哉皇室盛矣厥章
義高靈臺美隆未央邁軌三五貽則霸王永世垂範億
載彌光其祕書監胡義周之辭也名其南門曰朝宋門
東門曰招魏門西門曰服涼門北門曰平朔門追尊其

高祖訓兒曰元皇帝曾祖武曰景皇帝祖豹子曰宣皇
帝父衛辰曰桓皇帝廟號太祖母苻氏曰桓文皇后勃
勃性凶暴好殺無順守之規常居城上置弓劍於側有
所嫌忿便手自殺之羣臣忤視者毀其目笑者決其唇
諫者謂之誹謗先截其舌而後斬之夷夏囂然人無生
賴在位十三年而宋受禪以宋元嘉二年死子昌嗣偽
位尋為魏所擒弟定僭號於平涼遂為魏所滅自勃勃
至定凡二十有六載而亡

史臣曰赫連勃勃獯醜遺類入居邊宇屬中壤分崩緣
間肆慝控弦鳴鏑據有朔方遂乃法玄象以開宮擬神
京而建社竊先王之徽號備中國之禮容驅駕英賢闖
闢天下然其器識高爽風骨魁竒姚興覩之而醉心宋
祖聞之而動色豈陰山之韞異氣不然何以致斯乎雖
雄略過人而凶殘未革飾非距諫酷害朝臣部內囂然
忠良卷舌滅亡之禍宜在厥身猶及其嗣非不幸也
贊曰淳維遠裔名王之餘嘯羣龍漠乘釁侵漁爰創宮

守易彼瓊廬雖弄神器猶曰凶渠



晉書卷一百三十

晉書卷一百三十考證

赫連勃勃載記黃兒姚邕小字也○綱目正誤男女始
生為黃黃兒猶言小兒也興弟邕嘗勸勿用勃勃興
不聽故曰不用黃兒之言今謂黃兒乃邕小字恐誤
姚興來伐至三城勃勃候興諸軍未集率騎擊之○三
當作貳亦作二本書姚興載記謂倉松番禾為二城
又下文徙其三千餘戶于貳城當即其地也

姚興將姚詳棄三城南奔大蘇○本書姚興載記云留

禁兵五千配姚詳守貳城則知三之當作貳矣

晉書卷一百三十考證